

Kua Santana?

Den último añanan, un fenómeno nobo a aparesé riba e esena boneriano: Onderlingehulp. E organisashon komersial aki, ta hasi tur e tramitenan nesario pa deramentu, ta suavisá e peso finansiero pisá di un intiero dor di nan sistema di seguro, i awor nan asta tin nan propio santana. Ya kaba nan tin 5.000 miembro na nos isla, hende ku ke hasi uso di e servisio ku nan ta ofresé.

Ta dudoso ku algu asina lo tabata pusibel algun aña pasá. Pa hopi hende, e sitio unda nan lo ser derá ta un asunto di gran importansia. P'esei hopi grupo religioso na nos isla tin nan propio santana. Tantu katólikonan, komo protestantnan i evangelistanan tin dos: un na Playa i un na Rincon. Pa basta aña, adventistanan tambe tin di nan mes. Poko aña pasá pentekostalnan i testigunan di Jehova tambe a haña tereno pa dera nan defuntonan. Ma ta e aña aki numa ku Onderlingehulp a keda kla ku esun di nan.

Den pasado, a reina un temor ku si un pèrsona kambia di religion, na momentu di morto e lo ser rechasá. Por ehèmpel, ora Iglesia Aliansa Evangélica a establese na Boneiru den dèkada 50, hopi hende a ekspresá nan miedu pa asosíá ku nan pasobra e grupo aki no tabatin santana. Pa eliminá e obstakulo ei, nan a hañ'é nesario pa konstruí nan propio santananan.

Antes, hende tambe tabatin un miedu mortal ku si nan tin mala bida, talbes nan kaha di morto lo mester pasa over di muraya di santana, na lugá di drenta di porta, i nan kurpa derá den shiké, un área den santana reservá pa hende asina.

En kontraste di Kòrsou i Aruba, religion a determiná e sitio di deramentu na nos isla. E úniko eksepsion di kua nos ta konsiente, ta Iglesia Aliansa Evangélica. For di su inisio te awe, ta pólisha di e iglesia aki ku kualke pèrsona ku tin mester di un lugá pa dera, por haña esaki den e santana aki, irespekto di religion. Komo resultado, derá huntu ku evangelistanan den e santana aki tin tambe ateonan, pèrsonanan sin religion, i stranheronan.

Ma awor, Onderlingehulp a introdusí un konsepto nobo: un santana sin laso religioso. Akinan, un ateo por ser derá meimei di un mormon i muslim, bou di un hindú òf hudiu, rondoná pa katólikonan, evangélikonan, òf hende sin religion.

Talbes algun hende ta haña esei problematiko. Ma e ta un problema di bèrdat? Fuera di e echu ku hopi hende tin nan propio kèlder òf ke ta derá huntu ku famia, ta importá unda e kurpa ta ser derá? E santana ta determiná e destino di e defunto? Talbes bo ta sospechá ku Dios Su opinion di bo lo ser afektá pa Su opinion di esun ku ta drumi den un kaha di morto banda di bo?--pasobra e tabata un malbat, esei kier men ku bo tin ménos chens di yega shelu?

E pregunta "Unda mi alma lo bai (despues di morto)?" ta muchu mas importante ku e pregunta "Unda kurpa lo bai (lo ser derá)?" Dios so sa kiku lo sosodé despues di morto, i El a duna un bista chikitu di esaki den Skritura.

Beibel ta laga sa ku **NO TIN DI DOS CHENS DESPUES DI MORTO**. "Ta poné pa hende muri blo un bes so i despues ta sigui huisio" (Hebreonan 9:27). "Ta di nesidat ku nos tur parse dilanti tribunal di Kristu, pa kada un por risibí su parti, konforme loke el a hasi tempu e tabata den su kurpa, sea bon òf malu" (1 Korintionan 5:10). Bo tin solamente e bida aki. Despues di morto lo bo ser husgá pa Dios. E Hues aki, lo duna Su veridikto perfekto: shelu òf fièrnu, A òf B...no tin C. No tin chens pa kompensá pa bo mal echunan dor di reinkarnashon òf purgatorio. "I lo sali (fo'i graf) esnan ku a hasi bon pa resurekshon di bida i esnan ku a hasi malu pa resurekshon di kondenashon" (Juan 5:29).

Unda bo ta derá no ta importá. Den kua parti di santana bo ta derá no ta importá. Banda di ken bo ta derá no ta importá. Loke ta importá ta unda bo ta bai despues di morto. Loke ta importá ta ku abo, durante bo bida awor, ta rekonosé ku bo ta un pekadó destiná pa fièrnu, i birando lomba riba piká bo ta pidi Kristu, Esun ku a tuma bo kastigu riba krus, pa skapábo di e destino ei i dunábo bida eterno na shelu. Mas pronto ku bo ta hasi esaki, mas mihó; pasobra nunca bo sa ki dia lo ta bo turno pa drumi den un òf otro santana!